

HABARI KASKAZINI

RUWASA, wananchi 'wavutana' kisa maji ya bomba

Na Godfrey Mushi, LONDIDO

MKWAMO wa utekelezaji wa mradi wa usambazaji wa maji ya bomba katika Kata ya Tingatinga, Wilaya ya Longido, mkoani Arusha, umeibua mtafaruku baina ya wakazi wa eneo hilo na Wakala wa Maji Vijijini (RUWASA).

Wakazi hao wa Tingatinga, wanadai hawaridhishwi na mwenendo mzima wa utekelezaji wa mradi huo.

Wiki iliyopita, wakazi hao walikusanyika mbele ya ofisi ya Serikali ya Kijiji cha Ngereiyani, kushinikiza mabomba yaliyohifadhiwa kwenye ofisi

hiyo kwa muda mrefu bila kusambazwa, wapewe sababu za kutotumika, wakati wao wanakabiliwa na shida ya maji.

Mkazi wa Tingatinga, Sara Emanuel, alisema wanawake na watoto wamekuwa waathirika wakuu wa adha hiyo kwa kuwa wamekuwa wakitembea zaidi ya kilometa 18 kila siku kutafuta maji vijiji jirani vya Wilaya ya Siha, ndiyo maana wanataka kupewa taarifa za nini kimetokea hadi mradi kukwama.

Mkazi mwingine wa kata hiyo, Wandeto Sidaye, alisema uamuzi wao wa kujikusanya ofisi ya kijiji ni kutaka kuishinikiza RUWASA Wilaya ya Longido, kuwaeleza sababu ya kukwama kwa mradi huo. Di-

wani wa Kata ya Tingatinga, Victor Lenganet, alisema kwa muda mrefu wamefuatilia mabomba hayo wakitaka yatumike kutatua tatizo la maji katika eneo hilo, lakini hakuna kilichofanyika, ndiyo maana wananchi wameamua kuvunja ukimya.

Lenganetnet, alisema licha ya Serikali ya Kijiji na uongozi wa kata hiyo, kuchanga fedha na kukodi katapira la kusaidia kuchimba mitaro ya kulaza mabomba, watekelezaji wa mradi huo ambao ni RUWASA, wameshindwa kuendelea na kazi na wanapouliza hawapewi sababu za misingi.

Alipotafutwa tutoa ufafanuzi kuhusu madai hayo ya wananchi, Kaimu Meneja wa

RUWASA, Wilaya ya Longido, Petro Mchenya, alisema tatizo la kusuasua kukamilika kwa mradi huo, chanzo chake ni mgogoro uliopo kati ya wakazi wa Wilaya ya Siha na Tingatinga.

Alisema mgogoro huo unatokana na wakazi wa Wilaya ya Siha, kugomea mabomba ya mradi huo kupita kwenye maeneo yao kwenda Wilaya ya Longido, jambo ambalo ndilo lililozusha mgogoro kati ya wakazi wa wilaya hizo mbili.

Kwa mujibu wa Kaimu Meneja huyo wa RUWASA, mgogoro huo kwa sasa tayari umekwishapatiwa ufumbuzi na wakati wowote kuanzia sasa, mradi huo utaendelea kutekelezwa.



Mkuu wa Wilaya ya Rombo, Raymond Mwangwala (kulia), akikabidhi bendera kwa kiongozi wa wapandamlima Kilimanjaro ikiwa ni Kampeni ya GGM Kili Challenge 2024 ya Kampuni ya Dhahabu ya Geita Gold Mining katika lango la Machame kwa kushirikiana na Tume ya Taifa ya Kudhibiti Ukimwi (TACAIDS), mjini Moshi, Kilimanjaro jana. Tukio hilo linashirikisha wapandamlima 52 na waendesha baiskeli 19, kwa lengo la kusaidia juhudi za serikali za kupambana na Ukimwi. **PICHA: MPIGAPICHA WETU**

Bil.2/- zakusanywa mapambano VVU, UKIMWI

Na Mwandishi Wetu, MOSHI

KAMPENI ya Kili Challenge, inayolenga kusaidia mapambano dhidi ya Virusi Vya Ukimwi (VVU) na UKIMWI imekusanya Dola za Marekani 806,000 (Sh. bilioni 2.15) katika Dola milioni moja iliyolenga kukusanya mwaka huu.

Kampeni hiyo ya kila mwaka inayoandaliwa na Kampuni ya Dhahabu ya Geita Gold Mining (GGM), kwa kushirikiana na Tume ya Taifa ya Kudhibiti Ukimwi (TACAIDS), kupanda Mlima Kilimanjaro kwa lengo la kusaidia juhudi za serikali katika kupambana na ugonjwa wa UKIMWI.

Hayo yamo katika taarifa ya Kaimu Mkuu wa Mkoa wa Kilimanjaro, Raymond Mwangwala, aliyotoa mwishoni mwa wiki katika lango la Machame la Hifadhi ya Taifa ya Kilimanjaro (KINAPA), wakati wa kuwaaga wapanda mlima 52 pamoja na waendesha baiskeli 19 wanaochagiza kampeni hiyo.

Katika taarifa yake, alisema serikali inaona uko mwanga endelevu katika kuu-dhibiti ugonjwa huo nchini.

Mwangala ambaye ni Mkuu wa Wilaya ya Rombo, alimwakilisha Mkuu wa Mkoa wa Kilimanjaro, Nurdin Babu.

"Napenda kuwashukuru GGM na TACAIDS, ambao ndio waanzilishi na waratibu wa kampeni hii ya Kilimanjaro Challenge Against HIV and AIDS; ambayo kupitia programu hii, leo kwa furaha kubwa tumekusanyika kuwaaga mashujaa waliojitoa kupanda mlima na kuendesha baiskeli kuzunguka Mlima Kilimanjaro.

...Napenda ifahamike kuwa lengo kubwa la kutekelezwa kwa kampeni hii, ni kuchangisha fedha kwa ajili ya kuchangia juhudi za serikali katika mapambano dhidi ya VVU na UKIMWI. Hivyo kupitia programu hii, wadau wanapata fursa ya kuchangia fedha na kufanya utalii katika Mlima Kilimanjaro."

Vilevile, Mwangala, alisema kampeni hiyo pia inalenga kujenga urafiki na ushirikiano na mataifa mbalimbali, ambayo raia wake wanajitokeza kushiriki kupanda Mlima Kilimanjaro au kuendesha baiskeli kuzunguka mlima huo.

Mkurugenzi Mtendaji wa GGM, Duran Archery, akizungumza kabla ya kuaga wa wapanda mlima hao, alieleza kuwa michango hiyo ni dhamira njema ya GGM katika mapambano dhidi ya UKIMWI nchini. "Tumejitaziti kikamilifu kuhakikisha kwamba Tanzania isiyo na UKIMWI inawezekana, kama kaulimbiu yetu ya mwaka huu inavyosema, hatutakata tamaa, Ningependa kuwatia moyo washiriki wa tukio la mwaka huu, kwamba tuko nanyi kwa moyo na tutakuwa tukiwashangilia njia yote," alisema Duran.

Mbali na hilo, Mkurugenzi huyo wa GGM, aliongeza kuwa lengo la kukusanya fedha kila mwaka, ni kuchangia juhudi za serikali kufikia malengo ya sifuri tatu, dhidi ya UKIMWI.

Malengo hayo, ni maambukizi mapya sifuri, unyanyapaa sifuri na vifo vinavyohusiana na VVU/Ukimwi sifuri.

Awali, Simon Shayo, Makamu wa Rais wa AngloGold Ashanti, anayeshughulikia masuala ya uendelevu na mambo ya ubia (Afrika), alisema kuwa vikundi mbalimbali vimefaidika na kampeni hiyo, wakiiwemo watoto wa Kituo cha Moyo wa Huruma cha Geita, kilichoanzishwa mwaka 2006.

Wadau wachukua hatua kunusuru vyanzo vya maji

Na Godfrey Mushi, MONDULI

WADAU wa mazingira kutoka ndani na nje ya nchi, wameanza kuchukua hatua za kunusuru vyanzo vya maji vilivyoko hatarini kukauka katika misitu ya asili ya Serela na Losimingori iliyoko Wilaya ya Monduli, mkoani Arusha.

Vyanzo hivyo ambavyo ndiyo tegemeo la maji yanayotumiwa na baadhi ya tarafa za wilaya hiyo, vimeharibiwa kutokana na ukataji wa miti ya asili, kwa ajili ya biashara ya kuuza kuni na ujenzi wa makazi ya jamii za kifugaji za Kimasai.

Kutokana na uharibifu huo, Mkurugenzi wa Shirika la Masai Pastoralist Development Organization (MPDO Lareto), linalofadhiliwa na Shirika

la Maendeleo la Umoja wa Mataifa (UNDP), Baraka Laizer, alisema wamelazimika kuwapelekea wakazi wa kata za Serela na Repruko, mradi wa ufugaji wa nyuki kama chagizo la kiuchumi ili kuacha ukataji miti ndani ya misitu hiyo.

"Tangu tumebuni na kuu-leta mradi huu wa ufugaji nyuki katika maeneo haya, wananchi wameacha kufanya uharibifu kwenye misitu ya asili ya Serela na Losimingori.

"Dhamira yetu ni kunusuru mazingira na kukabiliana na mabadiliko ya tabianchi katika eneo hili lenye vyanzo vya maji. Kwa ujumla mradi huu unalenga kuhifadhi na kutunza vyanzo vya maji; ambapo kwa sasa tunafanya kazi ya kuzijengea uwezo kamati zinazoshiriki kutunza mazingira

na kulinda vyanzo hivi kwenye vijiji husika," alisema.

Mratibu wa mradi huo unao-tekelezwa na MPDO Lareto, Amani Sekino, alisema kwenye mradi huo tayari zaidi ya wanawake 60 wamepatiwa mradi wa ufugaji wa nyuki na wameanza kunufaika kiuchumi.

"Wanawake wa jamii za kifugaji walio wengi, wanategemea kuendesha maisha yao kwa kukata miti ya misitu hii. Kwa hiyo, ili kuwapa motisha ya kuachana na uharibu wa misitu ya Serela na Losimingori na kuvinusuru vyanzo vya maji kutoweka, ndio maana tukaja na mradi huu wa kiuchumi," alieleza Sekino.

Mmoja wa wanufaika wa mradi huo kutoka kikundi cha Enywata Maa, Nalembo Ole Shulu, kutoka Monduli,

akieleza namna ulivyoanza kubadili maisha yao kiuchumi, alisema mradi huo umewasaidia kuwa chanzo cha kipato kutokana na kuuza mazao ya nyuki.

Alisema kitaalamu, nyuki hazalisha bidhaa nyingi ambazo zina faida kubwa kiasia pamoja na maendeleo ya kiuchumi, kama vile nta, sumu ya nyuki, maziwa ya nyuki, vumbi, supu yake na gundi.

Alipohojiwa na Nipashe kuhusu mchango wa serikali, Mwenyekiti wa Halmashauri ya Wilaya ya Monduli, Isaac Joseph, alisema halmashauri yao inaunga mkono ujio wa mradi huo, kwa kuwa ni mkombozi wa mazingira yaliyoharibiwa kwa ufyekaji wa misitu kwenye baadhi ya vijiji, ili kuvuna miti ya ujenzi na biashara ya kuni.